

## Bročkaus ēšbaidīms

Senē senē Kumpēku kaimē gīvena tuoks ūkēninks Struopos. Ons toriejē daug žemēs, vo vēins pats nespiejē vēsū darbū apdērbtē, dieltuo somdē žmuonis.

Vēina vielīva rodēns vakara tuoks Bročkos Pietris atējē pas Struopo lēnū brauktē. Tēi lēnā bova pērtie, vo priepērtiē – arklē.

Struopos toriejē dvē doktēris: Vuonē ē Magdalena. Tuos mergas somēs lējē Bročko išbaidītē. Bročkos atējē i pērti, pasēkabēna palobie lēktarna ē pradiejē lēnus brauktē, vo tuos mergas pro oždoralī nubiega i kēta pērtēis gala, pasēlēpa ont ardu. Vo biegdamas da prisērinka ē arklašūdiu. Tumet anuos po bēški pradiejē i arklius mietliuotē tus arklašūdius. Tēi mizerējēs pradiejē baidītēis – vēins i kēta veizas ē prunkšt prrrrr, prrrrrrrrr, prrrrr. Bročkos saka: „No kas jums īr – tērrrr tērrrr, arklelē!“

Vo mergas dā daugiau mietliuo. Tas žmuogos tomsie tū mergū nemata, vo arklē jau rēstiuom aplinkou lek ē da daugiau prunkšt prrrrr, prrrrr, prrrrr, prrr, prrrrr. Bročkos apētās saka:

„Vo jergau, arklelē, a jus biesa matuot, kuo jūs baiduoties?!“

Mergas dā daugiau pradiejē mietliuotē tus arklašūdius. Arklē gatavā patraka. Bročkos jau nejoukās ēsēgonda, vo tuos mergas joukās natver. Je, Bročkus tik nusēkabēna lēktarna, arklelems tēk tērrrr tērrrr tērrrr, vo pats spūdē spūdē i truoba. Mergas strēmgalvēs nušuoka nu ardu ē rēstiuom viel pro oždoralē posē sobiega i ožpečēnē, sosieda pri mūralē ē sied, kap nieka nežēnontēs.

Parēn ē Bročkos, vo tātulis ē klaus anuo:

No, Pietri, jog žadiejē ligi rīta meta tus lēnus brauktē, vo kas dabā nutēka – mosint išbaidē kas?

Nē nē, kas moni išbaidīs – aš nieka nabējau!“ – sovapiejē.

Vo tatā, kāp bova senās laikās, ka žmuonis vēinē kētus baidīdava vo paskou rokoudava, ka īr baidīkliu.